

ALAHADY 3 Fiavian'ny TOMPO - TAONA A



"Ianao va ilay ho avy, sa mbola hafa no andrasantsika?"

Ry Kristianina havana, mitohy hatrany ny diantsika mankany amin'ny Noely ary azo lazaina fa misasaka ny làlana. Ny tenin'Andriamanitra dia mampitsinjo atsika sahadry amin'izay andrasantsika amizay Noely izay amin'izao Alahady fahatelo fiaviana izao. Antsoina izao Alahady fahatelo izao ho alahady hafaliana satria miverimberina matetika amin'ireo vakiteny androany ny resaka hafaliana, izay manentana atsika sahadry amin'ny hafaliana entin'ny Noely.

Hafaliana ny antsika raha mandray an'i Jesoa izay tonga eto anivontsika tokoa, fiadanana ary manakoako amin'ny feon'ny anjely, izay no asongadin'ny vakiteny telo anio ary mbola asain'ny Eglizy

koa isika hiaraka amin'ni Md Joany amin'izany fiomanantsika izany satria efa akaiky dia akaiky isika amin'ny fiomanana ny Noely izany ka hiadivantsika amin'ireo ratsy izay mety manakantsakana atsika. Ady sady dia no entintsika miatrika an'izao fiavian'ny Tompo izao, mba ho izy tokoa no tonga eo anivon'ny fiainantsika ka hitondra tokoa izany hafaliana sy fiadanana izany. Fa arakarakiny fahaizantsika mandray sy

manome toerana an'i Jesoa amin'ny fiainantsika no hanova ny fiainantsika. Fiaviana vaovao no entin'i Jesoa ka zava boahary vaovao sy olombaovao isika raha manaiky an'i Jesoa ho tonga ao ampontsika ao.

Vakiteny I : Iz. 35, 1-6a. 10

Salamo : Sal. 145

Vakiteny II : Jak. 5, 7-10

Evanjely : Mt. 11, 2-11

Hafaliana mandray an'i Jesoa no ambaran'ireo vakiteny telo ary efa santarintsika izany amin'ny bokin' Izaia mpaminany " *Hifaly ny efitra sy ny tany karankaina, hiravoravo ny tany lemaka lava volo, ary hamony tahaka ny narisisa; hirakotra voninkazo sy hientan-kafaliana ary hanao hoby firavoravoana izy.* " Raha hafaliana mitafotafo no andraisantsika an'i Jesoa dia na tany hefitra na tany karakaina aza dia hanjary ho feno fanantenana.

Ry Kristianina havana izany koa no ezaka ataontsika eto amin'ny diosezy, ny fontsika karakaina feno fahotana , raha mibebaka isika dia hamokatra tsara tokoa ka hiala amin'izay manapotika ny fiainantsika isika. Raha mikarakara ny tontolo iainana koa isika dia miova ho tsara ny fiainantsika ka ho feno haravoana.

Alao hery ary ry Kristianina havana araka ny voalazan'Izaia amin'ny vakiteny voalohany , " *Ilazao ny mitebiteby fo ataovy hoe: "Makà hery fa aza matahotra"* ary tohizany ny hafatra " *Amin'izay dia hahiratra ny mason'ny jamba, halady ny sofin'ny marenina.* Maro ny aretina mikiky atsika, maro ireo habokana ara-panahy, ara-tsaina ary ara-bàtana fa raha mandray an'i Jesoa isika dia ho sitraniny izany rehetra izany. Maro ny zavatra mandringa eo amin'ny fiainantsika, hahitsin'i Jesoa izany, maro ny zavatra maha jamba atsika noho ny fahotana fa raha mandray an'i Jesoa isika dia hahiratra tokoa ny masontsika ka hahita ny tena marina isika ary ny fahamarinana no maha olona afaka atsika.

Antitraterin'i Md Jakoba izany ao amin'ny vakiteny faharoa (Jak. 5, 7-10) : mankahery atsika izy fa efa akaiky ny fanjakan'Andriamanitra. Mety misy fotoana mahakivy atsika na dia miezaka isika toa tsy misy vokany izany ka mampianatra atsika i Md Jakoba, mpamboly isika ka tsy maintsy misy ezaka atao. Ry Kristianina havana tsy maintsy misy ezaka ataontsika ary ao anatin'ny faharetana no hanatanterahana an'izany. Mora amintsika ny manomboka zavatra kanefa tsy tanterahintsika eo amin'ny fiainantsika. Aoka hanana faharetana isika raha tiantsika tanteraka ny voalaza ao amin'ny bokin'Izaia mpaminany .

Manana ohatra velona isika araka ny voalaza amin'ny Evanjely : Nanambara an'i Jesoa sy vavolombelony no nataon'i Joany tamin'ny fiainany ka noho izany no nanaovana azy tany an-tranomaizina tamin'izany fotoana izany. Naheno ny nataon'i Kristy ary i Joany raha mbola tao an-tranomaizina ka nampanontany ny mpianany ny momba ny an'i Kristy. Dia nolazain'i Jesoa Kristy hoe : *"Mandehana ka lazao amin'i Joany, izao zavatra renareo sy hitanareo izao: mahiratra ny jamba, afaka ny mandringa, sitrana ny boka, malady ny marenina, atsongana ny maty, torîna amin'ny malahelo ny Evanjely, ary sambatra izay tsy tafintohina noho ny amiko"*.

Ary rehefa izany i Jesoa koa dia nanambara tamin'ny vahoaka ny momba an'i Joany fa izy tokoa no mpaminany lehibe indrindra, ary ambony noho ny mpaminany aza satria izy ilay voahosotra dia i Joany Batista.

Isika ihany koa amin'izao fiaviana izao no aoka hanambara an'i Jesoa na dia anaty fahasahiranana aza ary mety tsy mora izany fanambarana an'i Jesoa amin'ny fiainantsika izany fa aoka isika haneho azy tahaka nataon'i Joany amin'izay dia hiova ny fiainantsika sy ny manodidina atsika.

Marina fa mety misy ny fahakaviana fa fanomezan'Andriamanitra ny finoana, fanomezan'Andriamanitra ny hafaliana ka aoka ho entintsika am-bavaka izany rehetra izany.

Fotoana hibebahana, fotoana hanatonana an'Andriamanitra bebe kokoa izao Fiaviana fiomanana efa manakaiky ny Noely izao ka noho izany dia efa eo ambaravarana tokoa ny Tompo ka aoka isika tsy hatoritory fa hanavao ny fiainantsika ao amin'Andriamanitra, hiroso hivavaka bebe kokoa, hanokatra ny fontsika sy ny fianakaviansika ary ny fiaraha-monina misy atsika amin'Andriamanitra dia ho tonga i Jesoa hitondra izany hafaliana izany ka na dia maro aza ny mety mahajamba ny masontsika, na maro ny mandringana sy manaloka ny fiainantsika dia i Kristy fahazavana no hampijoro sy hanangana atsika, hamerina ny hasina maha zanak'Andriamanitra atsika ka hivoha tokoa ny lanitra : eo anivontsika Andriamanitra.

Izany no firariantsoa ataontsika sy hirosoantsika lalindalina kokoa amin'ny fiomanana ny fiovan'ny Tompo sy amin'ny Noely izao. Amen

Mompera Arseveka Mgr Benjamin Ramaroson